

# BREIZ-IZEL

D'am mignon an otro MENGUY, person Coatascorn.



Gant mor e - vel gou-riz tro - zro, Na kaer ec'h



eo Breiz hon Mam-Vro ! Bro ar gwe derw ar vein ka-



let ! Bro an tou - rio dan-te - le zet !

Gant mor evel gouriz tro-zro,  
Na kaer ec'h eo Breiz hon Mam-Vro !  
Bro ar gwe derw, ar vein kalet,  
Bro an tourio dantelezet !

Bro 'lec'h ez eus trouienno glas,  
Tosenno koant ha koajo bras,  
Bruk, lan melen er lanneier,  
Ha gwiniz kaer er parkeier !

Milino koz 'hed ar sterio,  
En o c'hichen dalc'h-mad skluzio,  
Dour o trouzal 'vel kounnaret,  
Da vont 'n e hent, pa ve harzet !

Gwenojenno ha hencho don,  
'Lec'h alies e red gedon,  
Kleuzio uhel 'tre ar parko  
'Lec'h kan an env war ar branko.

O kas o zaout war ar maezio,  
Pôtred vihan gant o sonio,  
Sonio ken koant ma ve laret  
Eo gant Ele 'vent richanet.

Mouez an hekleo 'barz an draouien,  
O tizrevel ar ganerien,  
Ha mouez ar c'hi a renk harzal,  
An disteran 'klevo trouzal !

Met deut breman da dal ar mor,  
Eus an Argoat deut d'an Arvor,  
Ewit gwelet ar gwagennu,  
O 'n em zraillan war hon aocho !

Neblec'h ar mor na sko ken gwaz,  
Neblec'h muioc'h na c'hoari vaz ;  
Labour 'nevo c'hoaz da beilhet,  
*Roc'h Breiz-Izel a zo kalet !*

Gant ar roc'h-ze eo e savet  
Hon zourio koant dantelezet,  
Tourio uhel 'vel bizied,  
'Trezek an env dalc'h-mad troet !

Stank e kaver en Breiz-Izel  
Kroaz-venerez, iliz, chapel !  
Labour ar fe, fe hon zado,  
'Deus gret kement a vuzudo !

Dre-oll, diouz krap an tosenno,  
Pe guzet 'kreiz an traouiennno,  
Eun iliz vrag pe eur maner,  
'Didu lagad an tremener !

Diouz ar mintin ha da zer-noz,  
'Hed an draouien hag 'us d'ar roz,  
'Klewer o son an anjeluz,  
O hirvoudi ar glaz klemmus !

Ha d'ar zulio mouez ar c'hleier,  
Joausoc'h kals o vont dre 'n er,  
Evel douget gant an awel,  
'C'halw d'o iliz tud Breiz-Izel !

'Met eun dra c'hoaz 'glewer en Breiz,  
War ribl ar mor kouls ha 'n he c'hreiz,  
**Breiz 'deus eur yez, ar Brezoneg,**  
« Yez an dud vad ha kalonek ! »

Eur yez dispar 'halfe bean,  
O ya, Mam-gunv da nebeutan,  
Mam-gunv da yez ar C'hallaoued,  
Ha da gals c'hoaz komzet er bed !

O Bretoned, karet ho pro ;  
Miret erfad, ha war eun dro,  
**Ho kizio koz, ho yez, ho fe,**  
Bet gwir-Vreiziz en han' Doue.